

Arbeidsplan for Vestland SV 2021 – 2023

Vedteke på fylkesårsmøtet i Vestland SV 13.-14. februar 2021. Oppdatert på fylkesårsmøtet 12. februar 2022.

Kap 1) For dei mange, ikkje for dei få

Vi lever i ei tid prega av mange globale kriser, og av skjerpa politiske og sosiale motsetnader. Vi treng ein ny politisk kurs i landet vårt – og vi treng det no – for å setje rettferdig fordeling og naturen si tolegrense fyrst.

Vestland SV er fylkeslaget til SV i Vestland, som skal fronte eit aktuelt sosialistisk alternativ. Vi vil vere eit verktøy og eit middel til å byggje eit solidarisk Vestland basert på verdiar som nettopp solidaritet, mangfald, anti-rasisme og feminisme, og som vil kjempe sterkt for klima og miljø. Vestland SV vil kjempe for modige og kunnskapsbaserte løysingar for klima og miljø, grønne og trygge samferdsleløysingar, ein solid distriktpolitikk, rettferdig fordeling og like reelle moglegheiter.

For å få til dette, er medlemmane våre vår aller viktigaste ressurs. Medlemmane skal kjenne seg godt ivaretekne og heime i SV. Vestland SV skal leggje til rette for læring, aktivisme og gjere det mogleg for medlemmane til å arbeide for sine hjartesaker. Vi vil bygge aktive lag som er i stand til å drive engasjerande valkamp i kommunane i Vestland og for fylket, og setje vår politikk på dagsorden.

Interessene og behova til vanlege folk og naturen si tolegrense må kome fyrst. Til det, treng vi meir sosialistisk politikk. Vi treng eit sterkt SV: For dei mange - ikkje for dei få.

Kap 2) Medlemar

Medlemane er berebjelken til ein kvar organisasjon, og som eit sosialistisk parti ynskjer vi å fordele makta vekk frå leiinga og ut til folket. Difor er det viktig at vi alltid arbeider for å gjere Vestland SV til ein trygg møteplass for både nye og gamle medlemmar. Vestland SV har 31 lokallag av variert storleik og aktivitet. Dei siste åra har vi hatt medlemsvekst, som vi gjennom målretta arbeid vil vedlikehalde og styrke. Spesielt skal vi fokusere på vekst i dei lokallaga med færrest medlem, slik at dei i større grad kan drive sjølvstendig og trygt.

Mål og tiltak:

- 1) Vestland SV skal ha 2300 medlemmar innan utgangen av 2023
- 2) Vestland SV skal arbeide for 100 nye medlemmar innan utgangen av 2022.
- 3) Vestland SV skal arbeide spesielt for å hjelpe lokallag med under 30 medlemmar, slik at dei kan sende to delegatar til fylkesårsmøte. Målet for perioden er at minst 5 av desse lokallaga skal ha meir enn 30 medlemmar.
- 4) Vestland skal arbeide med å styrke rekrutteringa av medlemsmassen blandt studentar i fylket.
- 5) Vestland SV skal følgje opp nasjonale vervekampanjar, og i tillegg lage eigne tiltak lokalt for å byggje lokallag til verving

- 6) Alle nye medlemmar skal verte oppringt og ynskja velkomen av lokallaga eller fylkeslaget seinast ein månad etter innmelding.
- 7) Alle nye medlemmar skal i løpet av det fyrste halve året bli inviterte med på medlemsaktivitet. Dersom medlemen kjem frå ein kommune utan SV-lag kan dei koplast på eit nærliggande lokallag

Kap 3) Digital samhandling med veljarane

Dei siste åra har det skjedd gigantiske endringar for korleis folk i samfunnet mottek og behandlar ny informasjon. Sosiale media har gitt oss heilt nye talerøyr, nye måtar å kommunisere, og nye arenaer for å fremje vår budskap. Dersom SV skal ha ein brei oppslutning i vala som kjem, kan arbeidet og korleis vi fungerer i sosiale media vere avgjerande. Covid-19-pandemien har påverka korleis vi møter kvarandre og korleis veljarane orienterer seg. Det er grunn til å tru at ein del av desse mønstera vil påverke korleis vi møter kvarandre og potensielle veljarar også i framtidige valkampar. Difor er det særskild viktig at vi held fram med den bevisste jobben for å vere synlege og tydelege i sosiale media.

Mål og tiltak

- 1) Vestland SV skal halde heimesida oppdatert, og syte for at viktige saker og oppdateringar vert raskt tilgjengelege.
- 2) Vestland SV skal poste jamleg på Facebook og Instagram, blant anna ved å dele debilete frå SV nasjonalt, lesarinnlegg skreve av medlem, og reaksjonar på aktuelle tema frå samfunnsdebatten.
- 3) Vestland SV skal styrke kompetansen til folkevalde, tillitsvalde, og kandidatar om korleis dei kan vere aktiv som politikarar i sosiale media, blant anna ved å etablere og arrangere kurs. Vi skal spesielt byggje heiltidsfolkevalde til dette. Heiltidsfolkevalde har eit særskild ansvar for aktivitet på sosiale media, og skal arbeide for å godt representere våre verdiar utetter.
- 4) Vestland SV skal syte for at all videokommunikasjon (Livesendingar, kortsnuttar, og liknande) er teksta dersom det er mogleg, og formulert slik at det er forståeleg for folk flest.
- 5) Vestland SV skal arrangere kurs for medlem i korleis drive valkamp på sosiale media.
- 6) Vestland SV skal arrangere ein nettkampanje mot rasisme i samarbeid med antirasistisk utval.

Kap 4) Lokallag

Vestland fylke har 43 kommunar. Vestland SV har 31 lokallag fordelt på 31 kommunar. Av desse lokallaga er det 29 som har representasjon i kommunestyret. Vi har 58 folkevalde i kommunestyre og bystyre, og 4 folkevalde på fylkestinget. Det er stor spennvidde i kor aktive laga er, og kor mange medlemmer dei får med seg i arbeidet. Fylkeslaget skal stø opp om arbeidet i lokallaga. Fylkeslaget skal vere med å bidra til godt arbeid i kommunane, gje ny kunnskap og invitere til samlingar som gjev inspirasjon til fornøye innsats og politisk gjennomslag.

Mål: I 2023 skal fylkeslaget stille 33 kommunestyrelister.

- 1) I inneverande fylkestingsperiode skal vi starte opp 4 nye lokallag. Tysnes SV er alt starta.
- 2) Kwart lokallag har ein eigen fadder i fylkesstyret og skal bli følgd opp av fadderren.
- 3) Fylkesstyret skal invitere til jamlege felles nettmøte med lokallaga. I 2022 vil nokre av desse møta handla om å stille lister og førebuingar av valkamp, i tillegg til budsjettarbeidet i kommunane og å markere SV og å drive god organisasjonsoppfølging. Eit årshjul vert sett opp tidleg i perioden.
- 4) Lokallaga skal få tilbod om skulering, oppfølging av folkevalde og få besøk fysisk eller i digitalt møte minst ein gong i året.
- 5) Nye lokallagsleiarar (og lokallagsstyremedlem) skal få tilbod om å delta på nettmøte med opplæring i styrearbeid for lokallag.
- 6) Alle lokallag skal få tilbod om styreskolering innan ein månad etter lokallagets årsmøte
- 7) Det er et mål at SV lokallag som har SU-lag eller SU-medlemer i sitt område skal aktivt involvere SU-arar i sin lokallagsaktivitet, og om aktuelt, lokalpolitiske saker.
- 8) Vestland SV skal ha studentlag I dei områda av fylket kor det eksisterer ein studentmasse.
- 9) I dei lokallaga som har eit studentlag skal studentar bli involverte I lokal aktivitet og viss aktuelt, I lokalpolitiske saker.

Kap 5) Utval og nettverk

Sentralt i eit parti står politikktutvikling, debatt, samhald og inkludering. Utvala og nettverka kan spele ei viktig rolle på alle desse områda. Eit godt utval kan lage og vidareutvikle politikk, leggje til rette for debatt samt sikre samhald og inkludere og skape aktivitet for både nye og gamle medlemar. Utvala må sjølv skape aktivitet, men fylkesstyret og fylkeslaget skal legge til rette for gode og aktive utval gjennom perioden.

Alle utval

- 1) Fylkesstyret set ned utval og skal følgje opp utvala og nettverka, mellom anna ved at fylkesstyret er representert i alle utvala.
- 2) Utvala har som oppdrag å skulere på seminar og fellesmøte, skape og vidareutvikle politikk i tillegg til å utvikle og formidle kunnskap på einskildfelt.
- 3) Utvala skal i framkant av val setje seg inn i relevante dokument for fagområda sine. Framfor fylkestingsvalet skal dei spele inn til dei ulike delane av fylkestingsprogrammet til Vestland SV for 2023-2027, og bidra i valkampen.
- 4) Alle utvala skal fremje sitt politiske område både i samfunnet og i partiet. Til dømes ved å skrive lesarinnlegg, utvikle politikk og skulere fylkeslaget samt anna profilering.
- 5) Fylkesstyret skal opprette eit Skeivt Utval

Kvinnepolitisk utval

Noreg er kome langt i jamstillinga, men vi er framleis ikkje jamstilte. SV skal setje feminismen på dagsorden både i og utanfor partiet.

- 1) Det er eit mål at så mange som mogleg frå SV skal delta på 8. mars, og i Bergen skal kvinneutvalet saman med Bergen SV bidra til mobilisering til Kvinnefestivalen i Bergen.
- 2) Utvalet skal ta initiativ til å vere medtilskipar på minst eitt arrangement på kvinnefestivalen.
- 3) I framkant av 8. mars skal utvalet oppmode og bidra til lokallaga er aktive lokalt.
- 4) Utvalet skal jobbe aktivt for at kvinner stiller til verv i partiet og som folkevalde.

Miljøpolitisk utval

På kort tid må vi vri om økonomien ved å byggje grøn industri og utvikle grøn teknologi her på Vestlandet.

- 1) Utvalet skal ta ei leiarrolle i arbeidet med eit «Rettferdig grønt skifte» og skule-re partiet på området. Utvalet skal følgje aktuelle miljøpolitiske saker og markere partiet i viktige saker.
- 2) I samband med miljødagen 5. juni skal utvalet oppmode lokallaga om å lage aktivitet.
- 3) Utvalet skal ta kontakt med nokre av miljø-fagmiljøa og utvikle politikk basert på kunnskapen derifrå.

Fagleg utval

SV høyrer til i arbeidarrørsla saman med fagforeiningane. Saman kjempar vi for eit meir rettferdig samfunn og difor er tett samarbeid viktig.

- 1) I perioden skal utvalet fremje fagleg politikk både i og utanfor partiet. Til dømes gjennom å skrive debattinnlegg i tillegg til anna profilering.
- 2) Utvalet skal søkje å samarbeide med Bergen SV om det faglege arbeidet.
- 3) Utvalet skal drive nettverksbygging og søkje å kople saman SV-arar som er tillitsvalde i fagrørsla.
- 4) Utvalet skal i framkant av 1. mai syte for og oppmode til lokallagsaktivitet.
- 5) Eit mål for utvalet skal vere å aktivt gje innspel til, skulere om og vidareformidle saker i partiet på feltet.
- 6) Utvalet skal ha jamleg kontakt med dei leiande fagforeiningane og delta på samlingar.
- 7) Utvalet skal jobbe aktivt for at tillitsvalde stiller til verv i partiet og som folkevalde

Distriktpolitisk utval

SV vil ha levande bygder og byar og vi skal syte for berekraftige lokalsamfunn også i framtida.

- 1) Utvalet skal halde fram med å vere eit samlepunkt for SV-arar som er engasjert i dette saksfeltet.
- 2) Distriktpolitisk utval skal saman med fylkesstyret ta ei offensiv rolle i utviklinga av politikk som styrker distrikta, folkestyre og lokaldemokratiet.
- 3) Eit mål for utvalet skal vere å aktivt gje innspel til, skulere og vidareformidle saker i partiet på feltet. Både Sogn og Fjordane og Hordaland har mange små lokalsamfunn, og utvalet skal difor syte for at Vestland SV bidreg til politikktviklinga på feltet nasjonalt.

Antirasistisk utval

Nordmenn finst i alle fargar og formar. Likevel ser ein framleis rasisme og mangel på representasjon.

- 1) Utvalet skal fremje anti-rasistisk politikk både i og utanfor partiet. Til dømes gjennom debattinnlegg i tillegg til anna profilering.
- 2) Utvalet skal aktivt utvikle anti-rasistisk politikk og knyte band med andre antirasistiske organisasjonar.
- 3) Utvalet skal vere med å bidra til å ta imot og inkludere folk med minoritetsbakgrunn i partiet.
- 4) Antirasistisk utval skal jobbe aktivt for at SV-arar med minoritetsbakgrunn nominerast høgt på vallister og veljast til viktige verv i partiet.

Utdanningspolitisk utval

- 1) Utvalet skal utvikle politikk på utdanningsområdet, frå barnehage til høgskule/ universitet og innan etter- og vidareutdanning.
- 2) Utvalet skal arbeide for SV sin politikk på området og markere SV sin politikk og søkje å påverke både lokalt, i fylket og nasjonalt.
- 3) Utvalet skal gje råd og innspel til arbeidet i kommunane og i fylkeskommunen, mellom anna til SV sitt medlem i hovudutvalet for opplæring og kompetanse.
- 4) Utvalet vert leia av Åsmund Berthelsen som er nestleiar i hovudutval for opplæring og kompetanse i Vestland fylkeskommune.

Internasjonalt utval

Internasjonal solidaritet og internasjonal politikk er eit viktig politikkkfelt for SV.

- 1) I løpet av året skal fylkesstyret søkje å lage eit Internasjonalt utval i Vestland SV. Målet er å samle folk som har interesse og arbeidslyst for dette politikkkfeltet.
- 2) I første omgang er det eit mål å skape aktivitet til internasjonale politikk knytt til stortingsvalkampen.
- 3) Utvalet skal halde kontakt med internasjonalt utval sentralt.

Kap 6) Rekruttering

SV skal vere eit sosialistisk folkeparti og det er eit mål å utvide partiet vårt med mange og fleire menneske med ulike bakgrunnar og perspektiv. Det gjev brei representasjon og sørger for at vi gjev fleire ulike, viktige grupper eit rom der dei blir høyrde og lytta til. Nokre grupper må vi kanskje arbeide meir systematisk for å tiltrekkje oss. Vi ynskjer å nå ut til fleire minoritetar, og få dei til å bli medlemar og aktive i partiet. Spesielt i distriktslaga våre vil vi nå ut til fleire unge vaksne, og fagorganiserte.

- 1) I samarbeid med utvala våre, skal fylkesstyret invitere målretta når det er høvelege tilskipingar.
- 2) I arbeidet i framkant av listestilling til kommune- og fylkesting og Stortinget, er det særskilt viktig å få fleire frå dei gruppene vi ynskjer å rekruttere inn på våre samlingar.
- 3) Fylkesstyret skal saman med antirasistisk utval, dei andre utvala og lokallaga arbeide for å finne kandidatar med bakgrunn frå underrepresenterte grupper.

Kap 7) Skulering og debatt

Fylkeslaga i SV har ansvar for skulering i sine fylke. Med ein organisasjon som veks, må skulering vere ein viktig del av organisasjonsarbeidet også i åra der vi ikkje driv valkamp. Skulering av dei tillitsvalde er ein føresetnad for å fornye arbeidet i lokallaga, men det er like viktig å skulere nye medlemmer i politikken vår slik at dei kjenner seg trygge nok til å bli aktive, ta på seg verv eller bidra i komande valkamp.

- 1) Hausten 2022 vil Vestland SV søkje å få til ein felles ideologikonferanse saman med lokallaga etter mal frå tidlegare.
- 2) Vestland SV si fylkestingsgruppe har ambisjon om å bidra til skulering gjennom seminar og konferansar knytt til fylkestingsarbeidet og større overordna debattar. I samarbeid med fylkesstyret vil ein saman med fylkestingsgruppa skipe til heil- eller halvdags-seminar om aktuelle emne kvart år.
- 3) For å gjere terskelen for å delta så låg som mogleg, skal Vestland SV nytte nettmøte for å skulere nye medlemmer, til dømes med eigne nettmøte som tek føre seg emne knytt til sentrale og aktuelle debattar.

Kap 8) Kampanjar og merkedagar

Fylkesstyret, lokallaga og utvala skal bidra til kampanjar og markering av viktige dagar.

- 1) Merkedagane samefolkets dag 6. februar, kvinnedagen 8. mars, arbeidarane sin internasjonale kampdag 1. mai, FN sin miljødag 5. juni, Hiroshimadagen 6. august og FN sin internasjonale dag for å avskaffe vald mot kvinner 25. november, skal vere synlege i sosiale media, og det er eit mål at alle lokallaga bidreg til aktivitet i sin kommune desse dagane.
- 2) Vestland SV skal delta og støtte opp om Pride-arrangement over heile fylket. Alle tillitsvalde og medlemar må bli minna på å bruke slike merkedagar og kampanjar til verving av nye medlem.

Kap 9) Opplæring og oppfølging av folkevalde

Vestland SV er representert med folkevalde i fylkestinget og i 29 kommunar med til saman 58 folkevalde. Tre av desse er heiltidsfolkevalde: Marthe Hammer i Vestland fylkesting, og Mikkel Grüner og Diane Berbain i Bergen bystyre. Tre er varaordførarar: Vibeke Johnsen i Sogndal, Jan Olav Fretland i Lærdal og Kjartan Haugsnes i Vaksdal.

- 1) Folkevalsansvarleg i fylkesstyret utarbeider saman med fylkesstyret ein årsplan for nettmøte med folkevalde jamt fordelt utetter året. Nettmøta skal byggje nettverk mellom dei folkevalde, utveksle idear og erfaringar, og gje inspirasjon til vidare arbeid.
- 2) Det er eit mål å finne fellessaker som vi kan profilere saman i mange eller alle kommunestyre samtidig. På eit felles digitalt nettmøte etter fylkesårsmøtet, kvart år, avgjer dei folkevalde kva som skal vere årets kampanje for SV-representantane, og desse sakene blir drøfta vidare på dei faste nettmøta for folkevalde.

- 3) Fylkeslaget skal saman med gruppeleiar på fylkestinget og dei andre folkevalde bidra organisatorisk til denne felles saka.
- 4) Kvar haust skal budsjettarbeid vere eit viktig emne for desse nettmøta.
- 5) Fylkesstyret skal sørge for at dei som sit åleine og/eller er heilt nye i rolla som folkevalde for SV blir følgt opp av ein eigen fadder.
- 6) Fylkeslaget har ansvar for å informere dei folkevalde om møte og samlingar dei folkevalde kan ha nytte av å delta på.
- 7) Fylkeslaget skal lage og mobilisere til ei folkevald- og lokallagssamling der dei folkevalde er spesielt inviterte på hausten kvart år.

Kap 10) Førebuingar og gjennomføring av kommune- og fylkestingsvalkampen 2023

Tidleg i 2022 vert det arrangert eit eige listestillingsmøte mellom fylkesstyret og dei lokale laga. I dette møtet vert det analysert kva som er utgangspunktet for listestillingsarbeidet i Vestland SV, kor langt vi har kome i partibyggingssprosjektet og kva lag eller kommunar som krev størst innsats for å sikre ei god SV-liste. På bakgrunn av drøftingane vert det laga arbeidsfordeling og plan for listestillingsarbeidet i kommunane.

- 1) Fylkesårsmøtet i 2022 vel nominasjonsnemnd til fylkestingsvalet, og drøftar mål og arbeidet med listestillingsarbeidet gjennom året.
- 2) Fylkesårsmøtet set ned ein komité som skal førebu arbeidet og skrive framlegg til nytt fylkestingsprogram for Vestland SV.
- 3) Programutkast skal vere ferdig i oktober og sendast ut til medlemmane via lokallaga for ei innspelsrunde på nominasjonsmøtet november 2022 før det blir lagt fram på årsmøtet i 2023 for vedtak.
- 4) Programkomiteen skal ha ein open prosess der særleg lokallaga skal høyrast.
- 5) Det blir laga ei eiga skuleringssamling i november 2022, i samband med nominasjonsmøtet. Samlinga skal ta utgangspunkt i ansvarsområda til fylkeskommunen: Kultur, idrett og integrering, næring, opplæring og kompetanse, tannhelse og samferdsle og mobilitet.
- 6) For å førebu fylkeslaget på kommunevalkampen og fylkesvalkampen skal fylkesstyret setje ned ei arbeidsgruppe som skal utarbeide ei organisatorisk dreiebok for dei to valkampane. Denne skal vere klar til nominasjonsmøtet og fylkesårsmøtet i februar 2023.
- 7) Den organisatoriske dreieboka skal gje ei forventningsavklaring til kva som er forventa av lokallaga, lokale kandidatar, fylkesstyret, fylkeskontoret og fylkeskandidatane.
- 8) Etter nominasjonsmøtet vert det sett ned ei valkampgruppe som utarbeider valkampstrategi.
- 9) Våren 2023 skal fylkesstyret invitere til eit eige nettmøte om korleis førebu seg til forhandlingar etter valet. Det skal lagast ei eiga ressursgruppe som skal gje hjelp til dei som treng det i forhandlingane etter kommunestyrevalet.
- 10) Fylkesstyret skal saman med gruppeleiar på fylkestinget og dei andre folkevalde bidra organisatorisk til denne felles saka. Førsommaren 2023 blir det invitert til ei større valkampsamling for alle kandidatar, tillitsvalde og dei som ynskjer å bidra i valkampen.

- 11) Det skriftlege materiellet skal vere ferdig til trykking før jonsokaftan i 2023.
- 12) Fylkeslaget, fylkeskandidatane, lokallaga og dei lokale kandidatane er klare til aktiv valkamp frå 1. august.
- 13) Fylkeslaget skal hausten 2023 invitere til ei folkevaldssamling der alle folkevalde vert inviterte. Opplæringa skal fyrst og fremst handle om basisopplæring for å kome i gang med kommunestyrearbeid, som sakshandsaming, kutyme i kommunestyre, korleis ein kjem med forlegg til vedtak, korleis ein arbeider med økonomi og budsjettarbeid.

Kap 11) Førebuingar til valkampen 2025

Vestland SV ønskjer at regionreforma skal bli reversert og at Hordaland og Sogn og Fjordane skal gjenoppstå som eigne fylke, men det er ikkje fleirtal for oppløysing av Vestland i fylkestinget per i dag. Det er heller ikkje fleirtal i Stortinget for å gjere endringar i valkrinsane til Stortinget. Det betyr at vi må bu oss på at vi i stortingsvalet 2025 vil drive valkamp i to valkrinsar som i 2021.

Kap 12) Samarbeid med SU

Eit sterkt SU styrker partiet vårt. Ungdomane i Vestland SU er svært viktige for SV og eit godt samarbeid gjer oss betre. SU med sine mange unge, engasjerte og erfarne aktivistar ber skulevalkampen, og gjer dessutan eit avgjerande valkampbidrag for partiet.

- 1) Fylkesleiar skal to gongar i året invitere til samarbeidsmøte mellom leiinga i Vestland SV og Vestland SU. Dersom det er naudsynt blir det teke initiativ til fleire. Utover dette skal leiinga søkje å halde god kontakt og informere kvarandre.
- 2) SU organiserer skulevalkampen og ber om hjelp frå SV om det trengst.
- 3) SU deltek på fylkesårsmøta med sin eigen kvote og har også eigne representantar i ulike nemnder. I tillegg vert Vestland SU inviterte til seminar og samlingar i Vestland SV. Dette er viktig for å bli kjent med kvarandre, dele erfaringar og å lære av kvarandre.

Kap 13) Økonomiarbeid

Grunnlaget for godt organisasjonsarbeid er ein solid og sunn økonomi. Fylkesstyret skal sørge for å ha budsjettkontroll, og samtidig søkje å finne nye inntekter gjennom året. For å sikre at medlemmene kan delta i partiaktivitetane uavhengig av privat økonomi, skal Vestland SV i fellesskap søkje å halde deltakarpengar så låge som råd. Ei rekkje aktivitetar skal alltid vere gratis. Rettesnora i økonomiarbeidet er å sikre forsvarleg drift og at ein lukkast med måla i arbeidsplanen. I denne perioden er det ikkje noko mål om huskjøp som krev oppbygging av eigenkapital.